

15 SEP 1999

Mahathir-Panggung

ASPEK HALANG KEMAJUAN NEGARA PERLU DIGANTI, KATA DR MAHATHIR

KUALA LUMPUR, 15 Sept (Bernama) -- Aspek tertentu yang menghalang kemajuan dan menjadikan negara ini lemah perlu dikenalpasti dan diganti dengan nilai-nilai budaya yang boleh menyumbang kepada pembangunan bangsa dan pengekaln tamadun, kata Perdana Menteri Datuk Seri Dr Mahathir Mohamad.

Katanya rakyat negara ini tidak perlu meniru keruntuhan akhlak dan nilai yang sedang melanda tamadun Barat tetapi sebaliknya perlu mengekalkan nilai-nilai hidup yang secocok dengan budaya negara.

Di masa yang sama, nilai-nilai yang menyekat kemajuan perlu digugurkan atau dipinda supaya dapat mencapai matlamat untuk menjadi bangsa yang maju menjelang tahun 2020, kata Dr Mahathir semasa merasmikan Panggung Negara di sini malam ini.

"Orang Melayu dan bangsa-bangsa lain di Malaysia adalah dalam proses peralihan budaya yang ketara. Perubahan-perubahan dalam sistem nilai yang sedang dibuat bertujuan meningkatkan kefahaman tamadun bangsa dalam dunia yang pesat berubah," katanya.

Panggung itu diberi nama Istana Budaya dan menelan belanja RM210 juta.

Dr Mahathir berkata budaya bangsa yang lama dan usang tidak mampu mempertahankan tamadun Melayu dan kaum-kaum lain daripada dimusnah oleh bangsa dan tamadun yang lebih agresif.

Perdana Menteri berkata pertukaran nilai-nilai hidup tidak semestinya menghilangkan identiti bangsa sebaliknya pengekaln warisan seni dan budaya dalam acara-acara tertentu termasuk hiburan dapat mengekalkan identiti bangsa.

"Istana Budaya yang tersergam indah yang kita rasmikan pada malam ini dengan sendirinya, daripada segi fizikal dan rohani, melambangkan pembangunan seni dan budaya kita sehingga kini," katanya.

Ia boleh menjadi inspirasi kepada rakyat dan kepada para artis, penulis dan penulis drama yang akan mengadakan pertunjukan seni dan budaya dalam pelbagai bentuk, sama ada di Istana Budaya ini atau di mana-mana sahaja.

Bagi sesuatu bangsa dan negaranya, panggung utama adalah lambang ketinggian seni dan budaya dalam tamadun bangsa itu dan menyumbang kepada pemupukan seni dan budaya serta perkembangannya supaya arus zaman tidak menghilangkan warisan bangsa.

"Yang menentukan identiti bangsa bukanlah rupa paras, keturunan etnik atau warna kulit. Yang memberi identiti kepada sesuatu bangsa ialah seni dan budayanya," katanya.

Dr Mahathir berkata terdapat tiga tamadun yang besar dan tua di negara ini yang mempengaruhi seni dan budaya masing-masing secara spontan tanpa disadari atau dirancang.

"Tidak ada pertempuran tamadun di Malaysia. Sebaliknya penerapan nilai-nilai hidup, seni dan budaya menjadikan masyarakat Malaysia unik," katanya.

Dr Mahathir berkata pementasan memberi peluang kepada para artis, penulis dan penulis sandiwara menterjemahkan apa yang berlaku dalam kehidupan seharian masyarakat berbilang kaum Malaysia melalui cerita dan aksi.

"Artis dan penulis yang sensitif dan bijak akan dapat menyampaikan mesej yang membina bagi masyarakat. Sudah tentu mereka dapat menyumbang kepada pembentukan nilai-nilai yang membina yang akan memajukan bangsa," katanya.

Pengaruh pementasan tidak boleh dianggap ringan dan budaya barat, terutama British dahulu banyak terpengaruh dengan pementasan tulisan Shakespeare dan penulis drama lain dari Perancis dan Rusia.

"Daripada pementasan ini, nilai hidup yang hina dan rendah dapat dibandingkan dengan nilai hidup yang mulia dan tinggi," katanya.

Dr Mahathir berharap penulis dan penulis drama Malaysia juga dapat berbuat demikian dan rakyat negara ini perlu kepada panduan berkenaan dengan nilai-nilai yang perlu dipegang dan diamalkan.

Bagaimanapun Dr Mahathir berharap golongan ini tidak mengikut trend penulisan dan pementasan barat yang tiada sekatan terhadap ekspresi atau curahan perasaan dan nafsu.

"Institusi perkahwinan dan keluarga diganti dengan seks bebas dan tafsiran keluarga yang tidak ada kaitan dengan perkahwinan yang sah," katanya.

Dr Mahathir berkata Istana Budaya itu dibangunkan oleh kerajaan tetapi ia bukan milik kerajaan.

"Ia adalah milik mereka yang akan menggunakannya untuk mementaskan tafsiran dan terjemahan budaya bangsa, budaya yang menjadi sebahagian daripada tamadun kita yang muda dan rapuh."

Katanya sumbangan kerajaan kepada usaha membangunkan seni budaya dan seterusnya peradaban dan tamadun kita akan menghasilkan sesuatu yang menjayakan bangsa dan negara ini.

-- BERNAMA

AR RON